

«I sto midar insatge»

In discurs cun Marion Theus, purtadra da l'iniziativa da chatscha

DAVID TRUTTMANN/FMR

■ **Ella è la persuna enconuschenta davos la «Iniziativa per ina chatscha etica e cumpatibla cun la natira» – Marion Theus dal Partenz. Durant bunamain 10 onns ha ella cumbatti per l'iniziativa da chatscha. Questa dumengia decida il suveran grischun.** La FMR ha discurrì cun l'inizianta *Marion Theus* davart sia motivaziun da lantschar quest'iniziativa, davart l'idea da sterilisar selvaschina e davart la fin dal cumbat cun l'iniziativa.

FMR: Dal 2012 avais *Vus entschet a rimnar suttascripziuns per quest'iniziativa. Damai durant bunamain 10 onns avais *Vus cumbatti per quella. Quai è ditg.**

Marion Theus: Gea, quai è fitg ditg. Ina u l'autra chaussa è sa midada en il fratemp, p.ex. il scumond da sajettar cun muniziun da plum. Però i dat anc bleras chaussas che n'èn insumma betg bunas tar la chatscha grischuna. Uschia na poi betg ir vinavant! Però il temp sa mida, e sche la chatscha grischuna na va betg cun il temp, lura vegn ella a s'abolir sezza.

Co era atgnamain naschè tar *Vus avant passa diesch onns quest basegn da vulair «revoluziunar» la chatscha grischuna?*

Jau hai gea manà plirs onns in hotel. E durant quel temp organisavan nus adina d'atun era in buffet cun charn da selvaschina. Jau sun adina stada da buna fai ch'ìls chatschaders e las chatschadras fettschian quai segir endretg – enfin quel di che jau hai entschet a controllar en cuschina ils animals sajettads che vegnivan purtads dals chatschaders. Quai eran animals cun blessuras sgarschavlas, ruttadras dapertut, uschia ch'ìgl era nunpussivel da preparar quella charn. Perquai hai jau cumenzà a m'interessar pli fitg e senti detg spert: insatge è marsch! Qua capitavan chaussas che ston vegnir midadas.

Il messadi dals adversaris da l'iniziativa è cler ed evident: *Vus vulais abolir la chatscha grischuna.*

Quai n'è insumma betg vair. A nus vai per la protecziun dals animals. E sch'ìls chatschaders fissan propi interessads per il bainstar dals animals, lura avessan els tschertgà il dialog cun nus. Pertge han els insumma dad avair tema da nossas ideas? – Però na, ins na vul insumma midar nagut vi da la chatscha grischuna. Er la politica pretenda che nus vegli-



Dapi var diesch onns s'engascha Marion Theus per sia iniziativa da chatscha – per exempel avant tschintg onns cun intervistas en il Cussegl grond. Questa dumengia croda la decisiun.

FOTO SOMEDIA

an abolir la chatscha, p.ex. en il cudeschet da votaziun. Che nus veglian introducir la chatscha da reschia e che quai custia memia bler. Quai è ina insinuaziun, nua che votantas e votants vegnan cugliunads. Nus vulain refurmar la chatscha a favur da la protecziun dals animals – e betg abolir quella.

En dus puncts (ruaus d'enviern, proteger animals-mamma) mettais *Vus però en dumonda radicalmain la re-*

«Dapi 40 onns vegn organisada la chatscha speziala. E tge è il resultat? – Ins ha dapli selvaschina!»

Marion Theus, inizianta

gularaziun da selvaschina gronda, sco ella funcziuna oz. L'effectiv da selvaschina crescha però ferm. Co vulais *Vus regular e decimar la selvaschina?*

Ils davos decennis han mussà che chatschaders e chatschaders n'èn gnanc interessads da reducir l'effectiv da la selvaschina. Ins vul blera selvaschina. Mo sco exempel: Dapi 40 onns vegn organisada la chatscha speziala. E tge è il resultat? – Ins ha dapli selvaschina! Pertge betg midar la pratica? Noss punct da partenza è quel che nus schain: Damain squitsch

da chatscha dat a media e lunga vista damain selvaschina. Perquai proponin nus da reducir la chatscha a partir da november e da scumandar la chatscha sin animals-mamma. La selvaschina vegn lura a sa regular sezza.

En la campagna da votaziun avais *Vus proponì da laschar vaccinar ils animals-mamma, da sterilisar quels cun meds cuntraceptivs. Quai n'è bain betg realisabel!*

Cler che quai è realisabel. Betg immediat, però pass a pass e là nua ch'ìgl ha ina gronda cifra da selvaschina. Quai vegn gia oz pratitgà p.ex. en zoos u reservats. Però na, chatschaders e chatschadras na vulan betg quai, nagin interess. Ma lura duain els era dir quai sinceramain e betg pretender che noss'idea na saja betg realisabla u finanziabla.

Però fiss quai propi cumpatibel cun la natira – da sterilisar? N'è betg en maun da Dieu la metoda da sajettar ils animals la pli «naturala» – la simpla e crudela mort?

Nossa natira n'è schon oz betg pli «naturala». A partir da quel mument che l'uman ha entschet a «pfuschar» lien è la natira or da l'equiliber ed or dal gir natural. Igl è in desaster. Bain cler che la mort è naturala, però betg la mort violenta. L'entira istorgia mussa: Sch'ì dat dapli chatschaders, lura datti era dapli selvaschina. Il Grischun fa simplamain vinavant sco enfin qua, er sche la regularaziun sco ella vegn pratitgada oz na funcziuna insumma betg. E da vart da la chatscha na datti naginas propostas co meglierar la situaziun.

Sch'i va tenor las parolas da las partidas politicas, lura vegn l'iniziativa refusada cleramain. Sche quai avess dad esser il cas questa dumengia, lura è il cumbat da Marion Theus terminà?

Na, quel na vegn betg ad esser terminà. Nus vegnin ad analisar ils resultats ed a decider tge e co. Ma i dat era en auters chantuns problems cun la chatscha. La dumonda co proteger ils animals na vegn betg ad esser terminada cun questa votaziun. Ed aifer ils aderents da l'iniziativa vegni a dar ina midada da generaziun. Per ch'ì saja cler – nus essan moderads, la generaziun giuvna è bler pli decisa. I sto midar insatge, uschiglio vegn la chatscha a s'abolir sasezza.

Guardà enavos – fascessas *Vus anc ina giada quest cumbat?*

Jau n'aveva betg spetgà ina resistenza cun quella violenza, cun smanatschas ed inscutters malempernaivels. La moda e maniera co i vegn cumbatti ozendi è per mai nunchapibla. Ma quai n'è probabel betg in problem specific grischun, ma bain en general in manco da chapientscha per la democrazia. Per turnar tar Vossa dumonda: Gea, jau cumbattess anc ina giada. Quai è stada mia obligaziun e mia empermisschun, suenter avair vis ils animals morts en mia cuschina d'hotel.

Ilis postulats da l'iniziativa

(fmr/dat) Cun totalmain nov puncts vules la «Iniziativa per ina chatscha etica e cumpatibla cun la natira» refurmar la chatscha grischuna. L'iniziativa è vegnida purtada da l'uniun «Wildtierschutz Schweiz». La persuna ch'è s'engaschada davantvart è adina stada *Marion Theus*, l'antieriura hoteliera da Claustra.

L'iniziativa chantunala che va en votaziun ils 13 da zercladur era vegnida inoltrada gia dal 2014, ha lura però fatg in lung viadi tras las instanzas politicas e giuridicas, enfin ch'ella ha pudì vegnir sutmessada al suveran. L'iniziativa pretenda tranter auter da proteger animals-mamma, d'abolir la chatscha speziala e da scumandar che uffants sut 12 onns possian accompagnar durant in di da chatscha. Quasi tuttas partidas politicas refusan l'iniziativa – mo ils Verds dattan parola libra.